

003648

清容居士集

附札記

六

清容居士集

附札記

(六)

袁 樵 撰

叢書集成

初編

主編 王雲五

商務印書館發行

清容居士集卷第十六

開平第四集 壬戌

至治二年三月甲戌。改除翰林直學士。四月乙丑。出健德門。買小車。臥行八日。至開平。舍于崇真宮。有旨。道士免扈從。宮中闕無人聲。車駕五月中旬始至。書詔簡絕。僅爲祝文十三道。已入內制。悲愉感發。一寓於詩。而同院亦寡倡和。率意爲題。得一百篇。閏五月上幸五臺山。以實錄未畢。趣史院官屬咸還京。是月丁巳發。癸亥還寓舍。五月。灤陽大寒。閏月。道中大暑。觀是詩者。亦足知夫馳驅之爲勞。隱逸之爲可慕也。六月丁卯朔。梅鉞。

端午日。繇車中抵開平。客中三度端陽。愴然有懷。

居庸昔日逢端午。子規聲聲勸歸去。舊歲灤陽萬壽宮。九節菖蒲泛瓊醕。今年車中飽掀簸。盲風北來雨如注。沙坡馬鬣高下迎。土屋魚鱗先後附。舊家松篁百尋碧。蒼蘂花前石榴樹。停車俛首不得語。鄰牆簫聲雜駝鼓。勞生得意同蝸牛。奮臂卻行等蠅虎。

崇真宮闕無一人。經宗師丹房。惟蒲苗楊柳。感舊有作。

雙斛青蒲苗。中庭綠楊枝。門鎖碧窗寂。徘徊心不怡。辛勤四十載。逢辰構崇基。寒日淡無華。朔風助之悲。想此鸞鶴侶。長嘯悟成虧。往昔玉局翁。言罷白雲隨。懷賢感夙昔。悼念成涕洟。夜夢忽邂逅。掀髯歌紫芝。

閒閒真人未至

崇真觀裏獨徘徊。門鎖蛛絲燕子猜。玄度來遲愁欲絕。爲憑白鶴寄書催。

舊歲端陽與王吏部同客灤陽因成七言奉寄

舊年同飲端陽酒。擊鉢聯詩日未斜。我戴夫須重出塞。君飄蹀躞獨留家。雪花帶雨催前馬。草色連空趁後車。萬里功名頭竟白。張騫何事苦乘槎。

寓舍玄卿舊住今歸龍虎山書壁言懷

明珏出海見奇姿。價壓連城賈客知。往歲曾爲大鵬賦。今秋且作小山詞。黑頭好景傳杯樂。白眼長年按劍疑。君去我來同此榻。雁回何處寫相思。

五月八日雨霰

黑雲轉飛蓋。晴空落珠丸。急響遞疎密。跳跟杳無端。仰視烏輪光。粲粲不可干。陰晴界南北。咫尺分寒暄。蛟人有暗淚。乘陽湧冰瀾。又疑天女下。百琲隨輕紈。采之不滿把。瞬息何彌漫。東牆古楊枝。含思碧雲寒。留取宛轉花。伏日爲君看。

開平昔賢有詩片雲三尺雪一日四時天曲盡其景遂用其語爲十詩

茫茫廣漠區。屈曲層城建。昔云水雲陂。伐木嚴築鍵。寒沙雜軟草。其下有冰片。雙龍赴魏闕。雲氣時隱見。巍巍中天居。百里見行殿。

唐皇極睿算。憂邊罷從軍。種松八百里。擘畫疆理分。立象有定數。後王策奇勳。千車昂頭來。萬竈生墨雲。天險尙莫恃。人謀安足云。曉日出東門。寒光靜相涵。黑雲何方來。玉妃爲之驂。頃刻變昏晝。陰晴常日三。宸居逼象緯。熒煌斗司南。世儒窘六合。鄒子成虛談。羲和當中街。重裘慘顏色。詢彼住冬人。封戶雪蹰尺。松煙暗疎箔。羅坐圍丈席。南鄰時相通。北門恍未識。冰天與火井。受地各有職。近山如雕鞍。遠山如削鐵。涓涓落黃流。嗚咽恨未雪。坡陀下前坂。颯爽萬境滅。馬嘶不肯行。沙寒草如苗。氈廬峙前岡。一一望初月。駕鵝帖雲飛。下懼鷹眼疾。空墟無鴉棲。壞穴見鼠出。楊枝尙斂色。吐絮朝伏日。羌巴雜蠻獠。異服狀非一。風土諒不同。刪述在史筆。煌煌千賈區。奇貨耀出日。方言互欺詆。粉澤變初質。開張通茗酪。談笑合膠漆。憶昔關市寬。崇墉積如銍。梯航際窮髮。均輸乃疎術。城南水沮洳。飲之不盈七。遠汲沙水甘。客云汝縱恣。客竟遭河魚。投以百金劑。簞瓢乃真空。飾情果爲累。狙公解朝暮。不復計三四。亭亭芍藥枝。朱明勝春時。金蓮與墨菊。兄弟相等推。陽豔深摧藏。後秀真奇姿。盛時匪自棄。願與松柏期。

有客同爾心。臨風結長思。

皎皎三伏日。沈沈九秋天。雷鳴過牀下。月出在樹顛。手持五采筆。直侍虛皇前。大以書龜圖。小以傳瑤編。綸言廣聖澤。載歌千萬年。

南望

急靄輕雷五月天。舳舻手把趣裝綿。燕山南望十三驛。紅杏枝頭別有天。

天鵝曲

天鵝頸瘦身重肥。夜宿官蕩羣成圍。蘆根噉噉水蒲滑。翅足蹙曳難輕飛。參差旋地數百尺。宛轉培風借雙翮。翻身入雲高帖天。下陌蓬蒿去無跡。五坊手擎海東青。側眼光透瑤臺層。解條脫帽窮碧落。以掌疾擗東西傾。離披交旋百尋衰。蒼鷹助擊隨勢遠。初如風輪舞長竿。末若銀毬下平坂。蓬頭喘息來獻官。天顏一笑催傳餐。不如家雞柵中生。死守免使羽林春秋水邊走。

李老峪山水深類先公墓田左右悠然白雲之思

積翠發層巒。恍然家山圖。陰竇水屈曲。古樹雲扶疎。是時月新出。歸雁飛躊躇。疑我久離鄉。問我今何如。云昔所種松。靈籟吹笙竽。總角守庭訓。六籍師鴻儒。幸以鉛槧勤。三入承明廬。風景果有似。舉目諒不殊。信美非我土。誓言敢終渝。

偶成

午雷嬰兒聲。晚月大士面。頃刻備四時。陰晴足千變。空齋襲重裘。塵壁委團扇。昔爲居養移。今愧筋骸倦。

鼇峯石

劫風吹沫孕玲瓏。度海鞭霆駕六龍。聲合八音驚俗耳。重均九鼎動天容。空庭露冷珠璣綻。阿閣雲開錦繡封。匝匝金蓮隨地擁。似催夜直佩璫琤。石下皆金蓮花。

子規詞三首

不如歸去。君家南山松萬樹。我欲送君歸。憐汝歲上灤陽路。

去不如歸。江南春深筍蕨肥。筍蕨肥。子苦飢。見子手持一片冰。下馬坐看白雲飛。

歸去不如。我是蜀王魄。化聲呱呱。君不歸。請看錢塘雪浪千尺帆。踏歌起舞去復還。

盧彥威與余同爲待制。下世已八年。覲行院題名舊跡。感愴寫情。

長髯黑髮佩鳴珂。嗜飲常持金叵羅。詩豔欲追長吉製。詞新深愛小蠻歌。鳳池聯轡情偏重。鸞鏡重粧病已魔。彥威再醺一題壁淒涼悲二妙。元公近亦葬山阿。

元復初學士舊歲同官集賢會。于上都改除翰林學士。見其飲酒數十觥。倍常時。今年以疾卒不起。

覲行院題壁爲四韻以挽。

慷慨論交二十年。深慙經術荷推先。龜趺林立毛錐秃。麟筆星垂汗簡傳。直以曠懷招側目。肯於凡品說齊肩。舊聞蘇李曾生別。行院重來倍泫然。

潘景梁學士同在集賢朝夕與余論宏詞源委後俱罷去新政肇更皆得復入舊歲同會上都景梁還都不一月下世僕忝入翰林過視草堂有感

鑾坡清切平生志粉省烏臺謝不能嘗除尚書行臺侍御夜剔蘭鐙書葉亂凍呵鐵硯墨花凝蟻穿九曲誰傳授蛭化枯枝果變騰欲說玄機吾豈敢碧天雲黯喚難應

客舍書事八首

客景眞愁絕淒涼倍舊年草穿沙觜縮雲住屋頭偏竈冷廚煙溼窗低簷露懸畏寒難出戶盡日得高眠
日永空庭淨清齋罷煮茶無羊誰閱市有客共思家巷近逢歸馬門閒數過車衰年行六十那得老風沙
愁極吟肩聳塵深望眼迷屋隨冰上下山趁雪高低乾酪瓶爭挈生鹽斗可提日斜看不足踢舞共扶攜
蟾影穿窗蠹龍光拂席流淒淒三伏暑浙瀝九秋天水惡停泥井冰堅宿瓦溝年年游上國那識望鄉愁
問俗過閭里淒涼說住冬凍瓶粘在手暖扇縛當胸雪急鑼條響風高櫓樵鬆寒更傳警夜飛騎急憧憧
禁堞防危石官衢漾淺沙犬能搜兔窟馬解避臨車童翦青蔬甲僧分墨菊芽飄零堪慰藉小雨墊烏紗
宿霧成疎雨寒蓬捲細塵雲飛疑到地草長不知春香几蜂喧密寒房燕語眞白頭關塞外猶作未歸人
燈影微微焰鍾聲隱隱清歸鴻天際度去騎月邊行久客心無着微醺夢易成攬衣中夜起北斗正南橫

視草堂四詠

視草堂前月淒清十倍秋銀河斜處響玉斧暗中脩隱約娑羅見微茫顧菟流霓裳端可補願入廣寒游

視草堂前雪。飛花具四時。老疑潘鬢重。舞覺沈腰羸。妙合絲綸巧。功調鼎鼐奇。虛皇瞻咫尺。願賦玉京詩。視草堂前雨。飛空萬象新。隨龍下膏澤。滌穎布陽春。靈霖能生物。霑濡不受塵。巫山空有賦。難作楚王臣。視草堂前日。傳宣趣制詞。藁裁初刻上。朝罷八磚移。烏御行黃道。龍光映玉墀。薰風生殿閣。小立獨多時。

華嚴寺

寶構熒煌接帝青。行營列峙火晶熒。連斤巧闢攢千柱。相杵歌長築萬釘。殿基水泉湧沸以木釘萬枚築之其費鉅萬雲擁殿心團寶蓋。風翻簷角響金鈴。險知帝力超前古。側布端能動地靈。

贈華嚴長老二首

四年上國扈金輿。燕處高齋得起予。篋寶寸珠光不老。爐存片雪色相如。抱琴有意傳流水。擊拂無言指太虛。二十里松親見得。塔中古佛白毫舒。華嚴洞下宗常游四明太白禮宏智塔宏智相傳古佛再世

丈室蕭蕭晝掩扉。蒲團不下得忘機。塔前菊本先春種。門外楊花伏日飛。句落珠璣禪客誦。象嚴金碧梵王威。知余猶是青山伴。話盡斜陽指翠微。

書邢遵道二父家傳

蜚聲秀采動時賢。書帙如山酒似泉。已恨人間雙壁化。共誇身後一夔傳。藥囊有底陰功滿。詩卷相輝盛事全。會見門楣成晚秀。瀛洲委佩接羣仙。

贈寫真修生

丹青妍醜世間形。碧眼看天畫未成。夢覺已傳商相似。神閒能寫趙郎情。沙場燕領愁中樂。客舍鳶肩暗裏驚。彩筆閱人頭漸白。長因眸子識公卿。

贈李道士

高安李道士。貨藥繞灤城。竹杖常隨手。茶甌與解醒。住冬饒活計。聽雨話平生。欲說前朝事。年深記不成。

行路難五首

桑乾嶺上十八盤。赫日東出紅團團。迴頭平田樹如髮。北去沙石何彌漫。青帘高低知客倦。勸汝一杯下前坂。馬蹄護鐵聲琮琤。帖石朱欄列危棧。度嶺林昏泊官驛。冰湧虛泥踰五尺。馬行猶知泥淺深。重車沒蹠路莫尋。

松林巨木官探搜。千斧斫根膏液流。翠旄離披仆巨壑。百谷震動狐狼愁。大車以載牛馬喘。歷歷深不能挽。車頭挂紙齊聲呼。一步一移日將晚。經春踰夏來京都。雕梁繡柱天人居。錦茵花磚淺深護。歲久不知行路苦。

昔聞萬迴僧。空中轉足如飛鷹。又聞麥八百。側徑迴旋去無跡。牙牌校尉夸快行。急裝一日來京城。人言脛中有肉燕。猶雲蹠電那能名。古云行路難。今作等閒看。君不見明王坐朝疲心思。日行天下人不知。金谷園頭土如酥。瓊花琪樹凝流蘇。文鴛甃磚藻影動。飛鳳團礎雲光腴。紫絲步障三十里。百和生香交旖旎。美人羅襪不動塵。匝匝金蓮隨步起。須臾急騎圍四隅。瞬息突兀生寒蕪。綠珠危樓百尺墜。行路之

難卻成易。

弊裘蒙茸蘇季子。兩足重趼行不已。一朝佩印何纍纍。列鼎腥羶夸國士。班生遠出玉門關。被甲夜度隨黃間。飛沙擊面燕頰失。晚望落日思生還。書生守株燈火勤。終歲不通南北鄰。一朝安車入關內。老不能言願求退。

賣薪行

老兵縛薪穿市賣。雙手如龜布衣壞。低頭望日南階行。背負槎牙北風殺。大車輪困小車聚。我薪不如一抔土。黃公壚前煙霧高。揮手相譏不相顧。暮歸置薪眠土屋。望月清歌聲斷續。丈夫窮達會有時。買臣懷章人始奇。

視草堂歲久傾圯述懷二首

視草堂前草木青。微臣三入鬢星星。壞牆雨透蝸生角。舊竈泥深菌露釘。深恐雨鐘催曉箭。獨聽寒殿響風鈴。堂堂諸老冰漸盡。病叟應歸種茯苓。

昔時壽俊佩蹕躡。人物於今似眇然。倚馬誰憐才獨步。屠龍端信技無全。頒冰伏日金奩重。賜果薰風綺席鮮。可是虛皇疏顧問。玉堂舊事少人傳。

翰林故事莫盛於唐宋聊述舊聞擬宮詞十首

禁鐘初動趣傳宣。衣袖薰香到御前。漸近宮門扶下馬。內官分引導金蓮。

御筆圓封草相麻。龍牋香透擁金花。儀鸞勅設庭前候。賜酒方終更賜茶。
制草塗鴉未敢刪。內璫宣引侍龍顏。已分筆格金蟾滴。更賜端溪紫硯山。
春帖分裁閣分多。宮娥爭餽纈綃羅。青絲菜併銀盤送。幡勝新題墨旋磨。
文思如泉涌墨林。屏風院吏不須尋。舊時內相諸孫在。猶有當年掃閣金。
入院聽宣席未溫。賜金已向案頭存。故事入院傳旨畢賜葉金十兩始草制清晨上馬還家去。內出黃麻付閣門。
清馥香溫酒玉脂。祝文已撰報都知。夜來奉旨傳丞相。五朵雲濃押省咨。
天孫夜度玉潢清。內托銀盤湧化生。秋思未多團扇在。擬題宮怨月分明。
盤鵬暈錦是冬衣。鴿炭初生酒力微。聞道邊臣風雪苦。口宣臈藥布皇威。
贊書謄副節樓前。筐篚盈庭邸吏傳。深恨葫蘆陶學士。受渠犀玉索金錢。

書懷

曉來重續避風簷。午着輕羅更上簾。可是炎涼隨世態。病多時節要抽添。

五月二十日甘雨如注。江南呼爲分龍雨。

平疇龜拆禱龍君。百頃青黃兩界分。匝岸已霑三尺雨。隔溪唯見一川雲。誰家襪襪涼如水。此地祇裯火欲焚。共道神功有南北。老農元不廢耕耘。

五月廿六日大寒二十二韻

地界幽都正。風傳委羽來。陰機堅積沍。空竅起荒埃。炎帝辭施設。玄神擅展裁。氣疑翻溟滓。勢欲壓恢台。北戶嚴雲結。中街宿霧霾。睫流驚炙轂。吻咽訝銜枚。野曠狐歸穴。林荒雀下臺。趁虛人瑟縮。走驛吏徘徊。舊篋裘頻索。殘爐火易灰。當陽紈扇棄。薄暮酒尊催。牛喘猶瞻月。龍藏敢挾雷。曉吟肩峭直。午睡髮毵毹。絺綌聊增襲。簾帷莫浪開。鼎溫延上客。竈煬集羣孩。鳥認南枝宿。駝鳴北路回。沈寥河漢接。慘澹雪霜堆。重甲身僵仆。銖衣說詭談。已知鄒子的。更覺杜生哀。澤國朝曦赫。畚田溽雨催。鴻鈞陶石爍。金鑑煮冰摧。舊俗慙卑窘。新聞騁博該。廣寒今已到。姑射不須陪。

御天門聽詔

大樂出端門。金龍日正暎。千官齊跪聽。萬姓列行屯。親衛周廬列。王徭尺籍存。侍臣頭已白。宣室願陳論。

露立

空庭露立意茫然。簇簇飛雲萬馬旋。擬變清涼成佛國。不教人喚四時天。

喜吳宗師至

飛鶴馭空來。春濃洞府開。燈光爭夜月。磬韻起春雷。玉斗朝雲禮。金門就日回。的知仙桂種。玉斧更深培。

食杏有感

筠籠賜杏得嘗新。一一如拳醉臉勻。準擬重尋舊門館。空庭繫馬燕飛巡。

寄王繼學吏部

青春王吏部。東閣久相陪。聽雪聯詩送。看花竝轡迴。如何千里別。不寄一書來。拂拭題名記。深知吐鳳才。

皇城曲

堂堂瞿曇生王宮。幼年夙悟它心通。梵書未覩口已誦。底用城闕窮西東。淨居老人幻境異。故作恐怖生愁容。世間習妄了莫喻。要以神化開盲聾。歲時相仍作游事。皇城集隊喧憧憧。吹螺擊鼓雜部伎。千優百戲羣追從。寶車瑰奇耀晴日。舞馬裝轡搖玲瓏。紅衣飄裾火山聳。白傘撐空雲葉叢。王官跪酒頭叩地。朱輪獨坐顏酡烘。蚩氓聚觀汗揮雨。士女簇坐脣搖風。人生有身要有患。百歲會盡顏誰童。西方之國道里通。至今生老病死與世同。

天童山圓上人遠來開平訪華嚴以舊詩求題

三尺枯藤一卷詩。五千里外訪相知。鄉音未改眉毛在。曉過嶺西聞子規。手探驪珠顆顆圓。清如秋月獨當天。舊棲太白寒禁得。更上開平擬過年。

題信上人手書

南湖涼觀碧芙蕖。屢見臨池曉日初。一去天台隔生死。重來應寫梵天書。

客舍四詠

孤雲

膚寸出巖遲。亭亭大雅姿。肯因風共去。獨與月相隨。似絮飛無着。如山立不移。崑岡有片玉。歲晚話深期。

孤燈

寒燄出房微。前山尙落暉。酒醒光耿耿。鍾定影依依。蜨夢疑方化。螢流竟不飛。廿年長作客。獨照合玄機。

孤雁

舊日江湖伴。多因塞北分。身單追暮雨。翼冷帖秋雲。肯向蘆邊宿。還應枕上聞。沙洲增繳滿。不是故離羣。

孤鶴

絕頂看秋月。星沈萬象奇。難隨黃鶴侶。獨與白雲期。野性便金洞。清聲徹玉墀。山中王子過。時一聽參差。

次韻圓上人

大荒沙漠境全真。平楚天低絕見聞。此處無愁誰會得。琵琶一曲問昭君。我家鄴水望江神。君住鄴山半嶺雲。同向天涯作行客。定知猿鶴有移文。萬解千言任所之。一花五葉總牟尼。九龍峯鎖難分別。會見芙蕖長玉池。

次韻華嚴賀李彥方除監察御史

秀采寒光敵楚金。詞鋒能繼九州箴。鳳池舊直驚人海。烏府新除表士林。甄紹家聲真素業。簡騰民瘼是丹心。華嚴蓮社相期遠。應許遺民得共尋。

彭法師禱雨有感

神京歲歲春夏交。乾風捲塵喧四郊。銀潢清寒不可挽。火磈燥露焚鳥巢。廟堂憂惶走羣望。桂酒跪瀝陳

牲穀飛雲虛無恣強勉。古澗偃蹇專幽蛟。拾蜴旋舞破甕缶。髣髴作形糜藁莢。或夸巫言擊長劍。或騁梵語鳴銅鏡。老彭之孫赤松派。尸坐直欲鴻濛包。深知天水本一沓。山澤妙感窮義爻。三元上章給鳳札。九淵投簡驚蛟綃。大青小青各受令。旋轉急注搜巖坳。初疑飛繒蔽雲頂。恍若銀竹穿林梢。鳥衝沈冥舊栖失。虎度泥淖前林咆。迺知至道在瓦礫。芒刃不缺須良庖。皇皇真宰燭萬類。神運溥博民同胞。前驅招搖後玄武。朱冠鐵騎森旄旛。精誠相通顏咫尺。聾瞽未識徒譏嘲。白頭太史詎妄記。願以彩筆窮模描。

近爲盧真人作桐柏山賦以舊賢四詠復令賦詩次韻

雙闕高蹲仙境分。深留絕頂獨耕耘。雞啼流水村非遠。犬吠隔溪人始聞。翠蔓滿林俱上藥。黃雲封戶總回文。層霄笙鶴須臾見。不用談空李少君。王子乘鸞八極周。參差吹徹此淹留。緱山未信雙輶遠。滄海端如一羽浮。碑聳蛟螭擎雨露。賦鏤金石閱春秋。莫言劉阮歸無跡。政與寒巖二子游。遠瞰神山接海潮。羣峯匝翠周遭。漆書舊字開蒼蘚。金鼎寒光暎碧桃。瀑濺花香疑過雨。風回松吹似驚濤。昔年曾說王靈寶。冷笑人間有二毛。雷起平田過雨腥。居民猶說老龍靈。泉流洞口凝鍾乳。月落松間照茯苓。琴罷忽驚人換世。丹成深勸客延齡。仙翁久作朝元客。贏得瑤壇滿鶴翎。

再次韻